

- 1' Der ist eyn narr der trurt all tag
- 2' Vmb das er *nit* gewenden mag
- 3' Oder den ruwt / das er hat gethon
- 4' Eym gütz / ders doch nit kan verston



### Schencken vnd beruwen.

- 1 Der ist eyn narr / der schencken düt
- 2 Vnd das nit gibt mit gütem müt
- 3 Vnd dar zû sur / vnd übel sicht
- 4 Das eym nüt liebs dar von geschicht

---

2' nit | nitt *GW5041* uit *GW5046*

5 Do mit er gab / vnd lon verlürt  
 6 So jn syn schenck so vast bedürt  
 7 Als düt ouch der / der etwas güt  
 8 Durch gottes ere / vnd willen düt  
 9 Vnd hat doch ruw / vnd leyd dor von  
 10 Wann gott jm nit glich gibt den lon  
 11 Dann wer mitt eren schencken well  
 12 Der lach / vnd syg eyn güt gesell  
 13 Vnd sprech nit / zwor ich thū es vngern  
 14 Will er nit danck / vnd lon entbern  
 15 Dann gott sicht ouch des gab nit an  
 16 Der nit mit freüden schencken kan  
 17 Jeder das syn behalttet wol  
 18 Zū schenck man nyeman zwyngen sol  
 19 Alleyn vß fryem hertzen gat  
 20 Die schenck / die yedem wol an stat  
 21 Seltten verloren wirt der danck  
 22 Wie wol er ettwan kumet langk  
 23 So würt es doch gewonlich schlächt  
 24 Dann zwen vmb eyn / ist faden recht  
 25 Ob eyner schon vndanckbar sy  
 26 Fyndt man dar gegen eren fry  
 27 Eyn danckbaren wisen man  
 28 Der es alles wider gelten kan  
 29 Aber wer schenck verwissen düt  
 30 Der will den druck nit han für güt  
 31 Vnd will nit warten wyder gob  
 32 Verwissen schenck / ist gar zū grob  
 33 Man sicht den über die achslen an  
 34 Der syn güttāt verwyssen kan  
 35 Vnd würt jm sunst nit me dar von

---

33 den GW5041 GW5046 ] jn GW5047